

Festival Garante Promove Paz Ba Eleisaun Parlamentar

Programa festival ba dame sei hahu hatudu iha area konfliktus iha Dili laran ne'ebe maka kria husi ONG Ba Futuru iha loron Kuarta (30/5) ohin, garante sei promove paz iha eleisaun parlamentar iha loron 7 Julho mai ne'e. "Programa festival ba dame sei hahu hatudu iha area konfliktus iha Dili laran atu promove dame ba eleisaun parlamentar," Sierra James, Program manajer ONG Ba Futuru hateten liu husi karta komunikadu ne'ebe Jornal Nacional Diario asesu Tersa (30/5) horseik. Sierra James dehan, ONG Ba Futuru halo servisu makas hodi fo treinamentu ba jovens sira ne'ebe maka

iha risiko violensia dirante fulan hat nia laran liu husi kapasitasaun iha area kompostu husi area media, lian Inglesh, debate no seluk tan. "Ba Futuru servisu maka'as hodi fo treinamentu ba joven sira ne'ebe iha risiko ba violensia durante fulan haat nia laran ne'ebe bele kapasita sira iha area hanesan: media, artes, lingua English, frama, debate, diskursu publiku, direitus humanus no rezolusaun konfliktus. Joven sira ne'ebe involve iha kursu ida ne'e sei organiza no hatudu festival dame ba comunidade, ne'ebe sei inklui musika no drama, no mos multimedia no

servisu artistiku seluk tan,"Sierra dehan.

Haklaken nia katak, eventu ida ne'e sai nudar parte ba Ba Futuru nia projeitu konaba Promosaun Dame ne'ebe hetan fundus husi German Federal Foreign Office lui husi Institute for Foreign Cultural Relations, no mos suporta husi programa treinamentu Adobe Youth Voices ne'ebe hetan orsamentu husi Oranizasaun Global Fund for Children (GFC).

Festival refere tarjetu ba joven sira no membru comunidade ne'ebe laos hola parte ba projeitu no hela iha areas konfliktus no sei koko atu hasa'e sira nia konhesimentu konaba

isu hanesan violensia eleisaun, direitus humanus, no rezolusaun konfliktus. Media artistiku konaba festival dame ne'e sei hatudu iha dalan publiku balun.

Iha fatin hanesan Jacinta de Sousa, nudar instrutor ba drama ne'e hateten katak, festival ba dame importante, tanba bele prevene ka hadok ema husi konfliktus.

"Drama iha festival ba dame ne'e sei ajuda hodi fo sai mensagen ba comunidade oinsa atu prevene ka hado'ok an husi konfliktus, Skenariu iha ami nia drama ne'e representa isu diferente ne'ebe bai-bain comunidade sira hasoru, hanesan

violensia domestika, abuzu labarik, problema Arte Marsiais no violensia elisaun."Jacinta hateten.

Nune'e mos Mario Britos tinan 27, estudante husi drama komenta liu ta katak, drama ne'ebe refere diak teb-tebes, tanba liu husi festival ne'e aumenta liu tan koinesimentu konaba saida maka violensia no saida maka laos violensia. "Drama ida ne'e importante tebes atu fo mensagen ba comunidade konaba saida mak violensia no saida mak laos violensia. Pesoalmente hau hetan buat ruma husi drama ida ne'e no hau hatene katak hau sei kontrola hau nia-an diak liu tan."Mario haklaken. alf